

# ديوان أنا مش عصفور كناريا

( أشعار بالعامية المصرية )

للشاعر الفنان / محمد صلاح



حقوق الطبع والنشر محفوظة  
لدار الأدب للطبع والنشر والتوزيع

دار الأديب للطبع والنشر والتوزيع

أنا مش عصفور كناريا.. ( الطبعة الثانية)

محمد صلاح

(2020 /3622) بدار الكتب المصرية

دار الأديب .



Gmail: [daraladeeb@gmail.com](mailto:daraladeeb@gmail.com)

Tel: 002- 0101444916

اسم الدار

اسم الديوان

اسم الشاعر

رقم الإيداع

الإخراج الصحفي



# إِهْدَاء

إلي / روح أبي .. الحاج صلاح

الصالح .. الذي كان إسماً علي مسمي .. أصل الشجرة  
الطيبة .. التي نبت منها جسدي وعقلي .. ورويت بماء  
النقاء و التقوي وطيبة القلب .. ورغم الغياب الطويل ..  
مازال يحيا في قلبي ونفسي .. ومازلت المجالس تطيب  
بذكرة الجميل ..

إبنك:

محمد صلاح

## أنا مش عصفور كناريا !!..

إنتي لازم تعرفي ..  
من غير تعالى ولا غرور  
إني مش عصفور كناريا..

بريش ملون أمور

اشتريته بفلوسك

من سوق الطيور

وحبستيه في قفصك

عشان مايقدرش يطير

ولا يغنى لحد غيرك

ويفضل جناحه مكسور

ولازم تفهمي ..

إني عمري ماكنت ملكك

ولا سجين في زنراتك

لايضحك ولا يتكلم

إلا بإذن منك ..

ولو خالف مره أوامرك

تحرميه من حبك

ومن حنان قلبك

\*\*\*

أنا يا مغروره إنسان

ربنا خلقه كده ... فنان

عصفور بلدي ... اسمراني

مغنواتي ... ومعجباني

بيعشق الطيران

وهو سعيد نشوان

لا عمره طاق السكات

ولا خنقة الكلمات

وإلا .. كان زمانه مات

\*\*\*

فاوعى ف يوم تفكرى

إنك هتقدرى

تقيديني ..

أو بيكي تربطيني  
وعن الناس تبعيني  
بحجة إنك بتحبيني  
وعايزة تحميني  
وبلاش تتوهمي  
أحسن ف الآخر ..  
صدقيني هتندمي !!..



يا أحلى وأجمل صبيه ..

بحبك حب مالوش وصف

ولا عمرك شفتيه ف زمانك

كان الحب اللي جوايا كله ..

كأن مخلوق أصلاً عشاتك

وكان كل سنيني اللي فاتت ..

كانت مستتبه لحظة حناك

\*\*\*\*

بحبك زي حب الغريب ..

للحظه رجوعه لبلده ..

لبيته ... ولحته ضله  
تحت شجرة ف أرضه  
ولا بد تططب عليه ..  
وتمسح دمة خده !!..



## بجك يابت يا شقية !!..

يا أحلى وأجمل صبيه

يا ضي الشمس ف عنيه

يا نبع الحنان والحنيه

يا ريحة العبير الوردية

ونسمة الهوا العصريه



## ولسه باتمناكي..

أيوه أنا لسه بحبك ..

زي أول يوم شفتك

ولسه برضه باتمناكي

زي يوم ما عرفتك وكلمتك

ولسه بيرن ف وداني ..

صوتك اول ما سمعتك

بتنطقي حروف أسمى ..

برقة شفافيك وإبتسامتك

\*\*\*\*

ولسه فاكر صورتك

لما أول مره بوستك

وسقيتك حنان قلبي ..

ودقت شهد طعامتك

ورعشة سدرك وجسمك

لما ضميتك وحننتك

من ساعتها وأنا غرقان

لشوشتي في بحر حلاوتك ..



## إتي هتفضلي حبيتي..

لازم دلوقتي يا حبيبي

تكوني عرفتي وأتأكدتي

إني حبيتك من قلبي

وهويتك وعشقتك إنتي

وعينا أتعلقت بيكي

وجواها نمي ومددتي

وف نبض قلبي سكنتي

وفي شراييني عششتي

وخيالك دائماً على بالي

وصورتك بقت هيه صورتي

وصوتك دايمًا معايا  
في كل ثانية من ساعتني

\*\*\*\*

إنتني هتفضلي حبيبتي  
مهما قسيتني ومهما ظلمتني  
وحتى لو ف وسط البحر  
خدتني مركب وسافرتني  
أو في عز البرد والوحده  
قمتني من جنبني ورحلتني

أو في ليلة ضلمة كحل

طفيتي شمعتي وبعدي

أو ف نص سكتنا

سيبت إيدي وهربتي

برضة لآخر العمر ..

هتفضلي إنتي حبيبتي

\*\*\*\*

إنتي هتفضلي حبيبتي

مهما قولتي ومهما عملتي

لإنك بالنسبالي بلدي

وحدود عنيكى مدينى  
وشمسى وضلى وشجرتى  
وبحرى ومرساتى وشطى  
وقاربى ومركبى وسفينتى  
وكله كلمه ف قصايدى  
كنتى وحيى وملهمتى  
لأنك كل سطر فى روايتى  
وكل فصل من فصول حكايتى ..



## مفیش حد زيك !!..

إنتي مفیش حد زيك

لا ف جمالك ولا ف حلاوتك

ولا ف سحر نظرة عينكي

ولا ف رقة ابتسامتك

ولا ف حنية قلبك

ولا ف معزتك وغلاوتك

ولو في أي واحده

من بنات حوا طعامتك

ولا ذره واحده بس

من ظرفك وشقاوتك

كانت تخلى الدنيا كلها  
تشاور عليها وتتمناها  
وكانت الأرض تفرح  
لما تمشي عليها بخطاها  
ولما تهل ولا تظهر  
تنور ليها ومساها  
ولما الصبح تطلع شمسها  
تدفي كل القلوب بضياها  
وكان الحب ملا الأرض  
شرقها وغربها وسماها ..



## عينكي السود ..

عينكي السود جنتتي

وخطفت عقلي وسحرتني

ومن نفسي وأصحابي

ومن كل الناس خدنتي

بنظره واحدة منها ..

بدلت حالي وغيرتني

ومن غير ما أحس

جوه رموشها سحبتني

وفي بحرها الغويط

شدتني لجوه وغرقتني

وبنظرة ثانية ساحره

هزت كياني وزلزلتني

\*\*\*\*

عينكي فيها ابتسامه

ياما فرحتني وبسطتني

وياما ف عز إكتابي ..

ريحت بالي وهدتني

عينكي زي الشمس

ف عز البرد دفتني

وزي ضي القمر

ف عز الضلما نورتني

عينيكي هي صحبتي

اللي ياما ونستني

وهيه جنبه الشعر

اللي بالأغاني ألهمتي !!..



سبب وجودي...!!

لو قعدت أعد يا امه

أفضالك عليا

أبقى عايز ألف دفتر

ويمكن أكثر

ومش هاتكفي

عشان أوفى

فضل واحد منها بس

وهو إنك يا امه بس

اللي كنتي ..

سبب وجودي ..

وكنتي دائماً

براحتك تجودي

عشان أعيش

وأحقق مرادي..



## يوم مامات ..بابا جمال ..

وأنا عيل صغير

حببتك من أول نظره

لما شفتك بعينيا ..

وسمعتك لأول مره

يوم ما طلعت ع الشاشه

يوم عيد الثوره

وأبويا ساعتها قال

هو وكل الرجال ..

عاش جمال .. عاش جمال

بطل الأبطال ..

من يومها وأنا وكل العيال

بقينا نقول عليك

بابا جمال ..

ومن يومها وأنا بحبك

وماشي علي نفس دربك

وكلامك عشش جوايا

وصوتك بيرن في ودني

ونظراتك رشقة ف عيني

وصورتك عايشة ويايا

\*\*\*\*

ولما كبرت شويه ..

دخلت الثانوية الجوية

اللي أنته عملتها ..

عشان تخرج طيارين

لمصر اللي جايه

ويوم ثمانية وعشرين من سبتمبر ..

واحنا في المدرسة محبوسين

سمعنا الخبر الحزين

وقالو لنا : عبد الناصر مات

ومبقيناش مصدقين

أبونا جمال مات ؟

إزاي .. مش ممكن

طيب سايبنا لمين ؟

واتزلزلت الأرض تحتنا

وشق صوت بكانا السما

وغرقنا في دموعنا

وحسينا إنا ضعنا

ما أحنا لسه عيال

ولاد أبونا جمال

لكن ف لحظة فوقنا

واشدد عودنا

وبقيننا كلنا رجال

شجعان أبطال

وصرخنا : مُحال

نفضل هنا .. مُحال

لازم نروح نودعه

ونأخذ عزاه

زي كل الرجال

مش إحنا ولاده اللي رباهم

وهو اللي بنفسه سماهم

جيل الثورة الصاعد

الجيل الثاير .. الواعد

فلازم نمشي وراه

ونشيله على روسنا

ونوصله لمتواه

ولازم نأخذ عزاه

واتلمينا ع الباب كلنا

وهتفنا من كل قلبنا

بالروح والدم .. نفديك يا جمال

وبقي صوتنا كما الزلزال

فطلعنا قائدنا يحي حسين

أبو نسر ودبورتين

وشاورلنا بإديه لتين

وهو بيعيط بالدموع وقال:

أمال أنا أعمل ايه..؟؟

إنتوا بتعيطوا علي جمال

وأنتو عمركم ما شفتوه

وأنا اللي خدمت معاه

واكلت وشربت معاه

ومش حأروح النهار ده عزاه

وعشانكم حأفضل هنا

وها أقعد معاكم

تعزوني وأعزيكم

قولتوا أيه موافقين..؟؟

وفضلنا ساكتين

وإحنا ف دموعنا غرقاتين

وهو بيسح دموع ..

من عنيه لتين  
ومن اليوم ده ..  
وأنته ساكن جوايا  
لا نسيتهك يوم ..  
ولا غبت عن سمايا  
يا بطل الأبطال  
يا أعز الرجال  
يا بابا جمال ..



يا وجع قلبي يا.. بلدي...!!

آه... يا وجع قلبي

عليكي يا بلدي

وعلى ولادك الطيبين

اللي راحوا غدر

على أدين خدارين

مجرمين وسفاحين

استحلوا الدم..

واستهانوا بالدين

وفي يوم عظيم ..

عند رب العالمين

ومن غير رحمه..

قتلوا كل المصلين

الراكعين الساجدين

\*\*\*

يا وجع قلبي..

ع العيال الصغيرين

اللي راحوا الجامع..

مبسطوين وفرحانين

مع الشيوخ والمسنين

والشباب المؤمنين

وكانوا كلهم قاعدين..

آمنين مسالمين

فدخلوا الكفرة ..

وقتلوهم أجمعين

دول لا يمكن أبداً ..

يكونوا بني آدمين

دول كلهم ملاعين

أولاد شياطين

لعنة الله على الظالمين

الفاستدين المفسدين

\*\*\*

بس اللي مصبر قلبي

إن كل الشهدا الراحلين

ع الجنة على طول رايعين

والملايكة زفاهم

وهما مهلين مكبرين

فيا بختهم يا هناهم

وهما عند ربنا مكرمين

وفي رياض الجنة منعمين

ومع الأنبياء والأولياء

قاعدين متجاورين

وهيدعوا ربنا ..

ع الظالمين

ويدعوه يحفظ بلدنا

وينصرها على الحاقدين

الخونة والمتآمرين

قولوا معايا آمين

يا رب العالمين..



لازم نور الفجر يهل !!..

لا عمر الضحكه هتداري الألم

ولا البسمه هتخبي الوجع

ولا هتلاقي الأيد..

اللي تمسح عن عيننا الدمع

لكن عشان ما تنكسرش

ولا تنهزمش

لازم نداري الحزن جوانا

ونخبي عن الناس أسانا

وإن كان الحب قدر مكتوب عليا

ومفيش مفر منه لما يجينا

برضه الفراق نصيب  
وإبتلاء من ربنا لينا  
فلا البشر ولا الظروف  
هما سبب القلب اللي مات  
سواء م الخوف  
ولا حتى من السكات  
ولا م الوجع والآهات

\*\*\*

دي كلها أقدار  
مفيش منها فرار  
ومالوش لازمه النواح  
لأن اللي راح ... راح

لا الميت هيرجع حي ..

ولا الليل هيبقي صباح

وبرضه مهما طال ظلام الليل

مفيش حاجة أسمها مستحيل

لازم نور الفجر يهل

ويشق سواد الليل ويُطل

والدنيا تضحك تاني

للحزين والوحداني

ولكل اللي ضاع عمره

واللي أتغدر بيه

وجنت الدنيا عليه

لازم يطلع قمره .. وصالحه قدره ..

يا صاحبي عيش لنفسك..

يا صاحبي ... ياللي قلبك ...

شاف كتير من غدر الزمن

وعمرك ضاع من غير تمن

ياللي ياما أديت لغيرك

من حبك وحنانك

ومن شقاك وتعب أيامك

لناس ماتستهلش

وللعشرة مابتصونش

وكنت دائماً راضي وصابر

وساكت مابتتكلمش

أنا عايزك يا صاحبي متر علس

من أي خاين و غادر

و عامل نفسه مش فاكرا

فضلك و خيرك عليه

و إنك كونت دايماً بتراعيه

و تسعده و تهنيه

ولما كان يجراه حاجة

كنت تبكي عليه بالدموع

و تولعه صوابك شموع

ولما كان بيجوع

تطلع اللقمة من بقاءك

وتدهاله متغمسه بحبك

اللي طالع من قلبك

\*\*\*

يا صاحبي ... فوق بقي لنفسك

وأنسي كل اللي خانك

وغدر بيك وباعك

وهجر حياتك وسابك

انساه يا صاحبي وعيش لنفسك

وأفتح للدنيا قلبك

وأنسى حزنك ويأسك

وأفتح للأمل بابك المقفول

وأياك في يوم تقول  
الحظ والنصيب والقدر  
لأن حظك هو عمك  
اللي لازم تتحدى بيه كل البشر  
وقدرك هو حلمك  
اللي لازم تحققه بنفسك  
وتكبر بيه أسمك  
أما نصيبك فدور عليه  
وأكيد هتلاقه  
مع قلب يهواك وتهواه  
ابدأ من جديد معاه

وعيش كل أحلامك  
اللي ضاعت من زمانك  
يلا غير حياتك  
قبل ما يضيع عمرك  
وتندم على كل اللي فاتك...!!



دايماً بجن لك يا.. أمه !!..

ودايماً بجن لك يا أمه ..

بجن لصوتك

وكلامك

ولمسة أيدي

وراحتك

وضمة صدرك

بجن لنظرة عنيني

وهيه بتبص ف عنيه

وتقرأ أفكارى وأسرارى

في أقل من ثانية

ودايماً كنتي بتفهميني

وبتكشفيني

لو حاولت أكذب

أو من عنيك اهرب

وبكل حنيه

تطبطني عليه

وتقوليلي يا نور عنيه

ماتضحكش على أمك

اللي مربياك

وعجناك وخبزناك

وأحكيلي ع اللي تعبك

ومتخبيش عليه

وقول كل اللي ف قلبك

عشان ترتاح

وهمك ده ينزاح

فلاقيني انتهت

وأتفكت عقدة لساني

وقولت : آه ياني

قلبي وجعني يامه

والدنيا معنداني

وحظي فيها قليل

وزماني نساني

فتضحكي وتضميني

وبحناتك تهديني

وبكلامك تقويني

وتبشريني

بأحلي بشره

باني بكره

هاحقق كل أحلامي

وأعيش اجمل أيامي

آه.. يا أمه...!!

يا عايشة في كياني

هافضل أحن لك

دايماً يا ست الكل

ياعود المسك والعنبر

يا طوق الفل..

يا طعم السكر

يا طاقة نور

في طبق بنور

وروح طاهره

لما علينا تدور

يروح الوجد منا

ونشم عبير الجنه



احلفي لي وأوعي...!!

ولما تبعدي عني

بحس ياروحي إني

روحي رايحة مني

لا لافي حد يسمعي

ولا يكتب شعر ولا يغني

\*\*\*

في غيابك بنسى ضحكتي

وفي قُربك بتزيد فرحتي

يا أجمل كلمة في غنوتي

خلي عيونك قبلي

وحلي بوجودك دنيتي

\*\*\*

يا زهرة الفل الندي

أوعى تحاولي تعندي

ولا ف يوم تتبعدي

يالاً إحلفيلي وإوعي

إن عمرك عنى ما هتبعدي !!..

بجك لما تتكلم ..

حببتك من قلبي وروحي

وبكل غموضي ووضوح

وبكل أمالي وأحلامي

ووجعي وألمي وجروحي

حببتك وبكل إرادتي

سلمتك كل مفاتيحي

\*\*\*

حببتك ولا يمكن اسبيك

حتى لو زدت ف تعذيبك

ورحت وقت عدولي

وجنت عقلي بغيابك  
بحبك يا قضايا وقدري  
وأنته نصيبي وأنا نصيبك

\*\*\*

بحبك لما بتتلكم  
ومن كلامك باتعلم  
وبفرح من قلبي جداً  
لما تجيني وتسلم  
وبضحك وأبقى مبسوفة  
وأغني وأرقص ع السلم

أنا كان عندي حق !!..

مرة أصحابي قاعدين يحكوا

عن أحوال الناس اللي حبوا

فأنا سرحت شويه ..

فبصولي .. وفهموا

وشاوروا عليا وضحكوا

وقالولي : أهلاً

هو أنته حبيت ؟

أنا قلت : طبعاً

سألوني : هيه حلوه ؟

أنا قلت بسرعة : أيوه

قالولي : طب أوصف

وأفكرت ها أعرف

وحاولت أعبر

وقعدت أدور

عن وصف ليكي

يكون في كلمة

أو حاجة فيكي

تخليكي قمه

ملقيتش غير كلمة واحدة

إن إنتي نسمة

بس إنتي مش نسمة لأ..؟!!

لأنك اجمل منها وأرق

وبجد أنا كان عندي حق

لما قلبي ليكي دق ..

لأنك فعلاً .. أروع الخلق ..!!



## بحر الحنيه ..!!

يا حبيبتى ... يا بحر الحنيه

يا روح قلبي ... وعينيه

ف عينيكى أنا بنسى الدنيا

ولا بقدر علي بُعدك ثانيه

\*\*\*

مديلي إديكي وضميني

وخديني في حضنك دفيني

واقري علي رأسي وأرقيني

من خوفي ووجعي وجنوني

يا حبيبتي .. دا حبك موصوف لي  
وعشقتك وعد وموعود لي  
وعذابي ف حبك مقسوم لي  
وأنا راضي بكل المكتوب لي ..



## لسه محتاج لك قوي !!..

آه لو تعرفي يا حبيبتي ..

أنا مشتاقك قد إيه

وفرحان إني هاشوفك

ومزقط مش عارف ليه

وحاسس إني طاير

والهوا شاييني بين أديه

وقاعد أعد الدقايق

ولسه علي معادك قد أيه

أنا عايزك تعرفي يا حبيبتي

إني محتاجك قوي بجد

زي الغريب التايه

اللي مالوش في الدنيا حد

وزي الطفل العطشان ..

المحروم من الحنان والشهد

ونفسه في سدر حنين ..

يدفيه في الشتاء م البرد

فلو بتحبيني قد ما بحبك ..

ولو وحشتك زي ما وحشتيني

وزي ما أنا مشتاق لعنيكي ..

إنتي كمان مشتاقة لعيوني

ولو أنا دائماً علي بالك  
ومتقدريش ابدأ تنسيني  
يا لا سيبي اللي ف إيدك ،  
وتعالى قوام قابليني ..



## بجك قد عنيا..

أيوه بجبك قد عينه

وقد روعي اللي فيه

وعشان تصدق

بُص ف نني العين دي شويه

وتحت رموش العين دي شويه

تلاقيك ساكن جوه العين دي

وناييم تحت رموش العين دي

ولما بشوفك ...

قلبي بيرقص جوه سدري

وبعيش فرحة ما شفتها عمري

بتخليني عايزه اجريلك

وأفتح قلبي وأحكيلك

وأفضفضك وأشكيلك

من وحدتي وأحزاني

ولهفة قلبي عليك

وشوقي إليك

وفرحتي بيك

لما أشوف صورتني في عينك

ولما تسببيني

أو تخصمني

لا بقدر أفكر..

ولا حتى أقدر .. أنام ولا أسهر

إلا لما ترجع تاني

وتنام جوه النبي التاني !!..



اتى فين يا.. أمه..؟؟؟

لما كنت صغير ..

كنت لما بخاف م الضلمة

ولما الدنيا بتبقي عتمه

باصرخ واقول يامااااه

ولما كبرت ..

كنت لما الدنيا تضيق ف وشي

وابقي لا عارف أناام

ولا أقعد ولا أمشي

أنادي عليكى يامه

ولما كان الحظ يعاندني

والهم يقهرني  
الدمعه تحنقني  
أصرخ بعلو صوتي  
وأقول .. يا مااه  
وأجري عليكي ..  
وأترمي بين أيديكي  
وأخش في حضنك  
وأقولك يامه الحقيني  
وف حضنك خديني  
وضميني يامه ..  
أجمد ضمه  
وطبطني عليا

وشيلي من عيني الغمه

وقولي أي كلمه

تظفي جوايا حريقي

يا صاحبة الحب الحقيقي

وكنتي تضحكي وتقولي

تعال يا بني..

يا حته من قلبي

يا نور العين والنني

وتمسحي بايديك علي راسي

وتهديني..

وبالقرآن ترقيني

فألاقيني ..

في لحظة باتتهد  
وأخرج كل اللي جوايا  
حزني وهمي وأسايا  
وأحكيتك .. وأفضضتك  
بكل .. كل أسراري  
وأحلامي .. وأفكاري  
والاقيني خلاص ارتحت  
وهديت وضحكت  
ولنفسي رجعت  
يااااه .... يا أمه  
فينك يامه..؟؟  
يا حبيبيتي يا أمه..

## فراقك صعب يا.. أمي..

فراقك صعب يا أمي

يا ساكنه جوه دمي

وحاسس يامه إني

من غيرك كاني

بقيت ف الدنيا لوحدني

ومحدث واخذ بيدي

ولسه مش قادر أصدق

إنك خلاص روحتي

وسبتيني وسافرتي

وماعدتش ها أشوفك

ولا ها أتملي بنورك

ولا ها أبوس ايدك

ولا ها أجيلك

وأنا شایل الهموم جوايا

وتايه وحيران

ومش عارف طريقي ولا خُطايا

ولا عارف أروح لمين

ولا ماشي رايح فين

وقلبي واجعني يا مايا

وها احكي لمين ؟

ومين هايسمع تنهيدتي

ولو صرخت !!..

مين هاي سمع صرختي..؟؟

يامه فراقك كسرني

وشق قلبي نصين

نص معاكي

ومعايا النص الحزين

عايش بيه..

بس والله .. ما انا حاسس بيه

أصلي عمري ما كنت اتخيل

إني هعيش يوم من غيرك

أو إن يومك ..

هيجي قبل يومي

او إنك هتنامي  
ومش هاتقومي  
عشان تصلي الفجر  
ولا هسمع صوتك  
وانتي بتقري القرآن  
بصوتك الجميل  
ووشك زي البدر..



يا..أمه يا.. روح الروح ..

آآآآه .... يامه..!!

يا وجع قلبي من بعدك

ويا غربتي في بعدك

يا حبة قلبي من جوه

يا روعي وحببتي

ياللي طول عمرك كُنتي

معايا مهما كنت بروح

يامه ياروح الروح

كنتي دايماً ملازماني

وبعنيكي حارساني

وصوتك مونسني

وصورتك جوه النني

وحبك مخليني

متعلق بديل توبك

ومتشعلق باديكبي

ومسكون بعنيكي

آه ... يامه...!

لمين بعدك ها أقول وأحكي..؟

ولمين يا سيتي ها أبوح وأشكي..؟؟

وأنا الحزين ..!

اللي طول عمره كتوم

ولا غيرك كشف نفسه

ولا حد ... حكي همه

ومين زيك ها يحبني

وينصحني ويردني

ويدعيلي من قلبه

إن ربنا يحبب فيه خلقه

ويحقق كل أحلامه

وكل الدنيا تشاور عليه

مين يا مة قوليلي؟

بس إزاي هتقولي؟

وانتي خلاص روحتي

وقولتي عدولي

ومش ها ترجعي تاني

ولا ها شوفك تاني

يا.. أمه يا .. روح الروح..



## قلبك الحنون ..

يامه يا حبيبتي

قوليلي بس ..

إنتي منين جبتي

الحب اللي جواكي ده كله..؟

والعطف والرقه

والحنيه والشفقه

وجمال الروح ..

وكمال العقل والحكمه؟

يامة قوليلي..

إزاي قلبك الحنون

كان بيساع كل الكون؟

ويجب كل الناس ..

وبيساعد المظلوم

وبيدي المحتاج

وبيهدي الحيران..

وبيفرح المهموم؟

وإزاي كنتي بكلمة

بتتوري كل الدنيا

وبتضيعي الضلمة؟

وكنتي دوا وبلسم..

بيداوي كل الجروح

وبلمسة من إيديكي

كنتي بتتردي فينا الروح؟

وكنتي يا.. أمه أستاذتي !!..

أمة ... يا للي كنتي

انتي لوحدك حبيبتي

وصاحبتي وصديقتي

وكل حاجة في عمري

وكنتي أستاذتي

اللي علمتني..

إزاي أنطق واتكلم

وإزاي أفهم وأتعلم

وكنتي انتي مُلهمتي

وَمُرشدتي..

لما في يوم أحتار

وابقى في نار

لا عارف أختار

ولا آخذ قرار

وكنتي مولاتي وشيختي

وصاحبة المقام العالي

اللي واقف على أعتابها

وبتمسح في شباكها

وباتمى كل يوم

أنول بركاتها

واللي كان ربنا

بيكرمني بس.. لأجل دعواتها..!!

## ( رباعيات )

(1)

أه منكم ياناس ياكدايين  
ياللي وار القناع متداريين  
في وشنا ملايكة طيبين  
وفي ضهرنا زي التعابين

(2)

ياعصفور يامكسور الجناح  
او عي تبطل غناك ف البراح  
داري الألم وداوي الجراح  
وسمعنا زقزقتك كل صباح

(3)

معلون ابو القلب اللي حبك

والي صدق كلامك وكذبك

والي اتمني يفضل جمبك

يسعدك تملي ويهني قلبك

(4)

يا أم العيون العسلية

قوليلي عملتي ايه فيا

من ساعة مشفتك بعنيا

مش عارف اتلم عليا

(5)

هتفضلي انتي لوحدك حبيبيتي

مهما قسيتي عليا او بعدتي

لانك جوه قلبي سكتي

وجوه شراييني عششتي

(6)

ارجوكي ابعدني عنكي عني

وشعاعها الطالع م النني

ولمعتها اللي بتاخديني مني

وضحكتها اللي بتهبني

(7)

قلبي الحزين بيفرح

لما فيكي بيسرح

زي ورده بتفتح

لما اشمها باطوح

(8)

مش عارف يابنت الاية

إنتي بتعملي ف قلبي أيه

بيفرح قوی لما تكلمية

وبيزقط كأنك بتزغزغيه

(9)

قالولي : ياعم الشاعر...

إنت كبرت وشعرك شاب

فبطل بقي كلام الحب...

وحكاوي العشاق والاحباب

قتلهم ياناس اعذروني

وبلاش تريقه ولوم وعتاب

اعمل أيه بس وانا قلبي

لسه لحد النهارده شباب

(10)

ياللي بقيتي حته مني...

وسكنتي خلاص جوايا

ياللي في عنكي بدوب...

زي التلج في الكوبايا

بالراحه عليا شويه...

وبلاش تعدي معايا

احسن والله اطنشك

واخليكي تجري ورايا

(11)

بحبك حب مالوش حدود  
وبقا جوه الضلوع موجود  
ويشهد عليا ربي المعبود  
إني بقيت بحبك موعود  
وكأني كنت بيه مولود

(12)

ياللي بجمالك سحراني  
وفي بحر عنيك مغرقاني  
وجوه ضلوعك سجناني  
ارحميني يابت يامجناني

(13)

ياحبيبي إتقل براحتك..

وأدلل عليا كمان حبه

عمري ماهز عل منك..

وانا عارف إنها محبه

وإن كتر الدلال بيزود..

الحب بين الأحبه

ويخليه بقدره قادر..

يبقى زي القشطه ع المربه

(14)

انا كنت قبل ما أشوفك

روحي محرومه وللحب محتاجه

وقلبي كان حزين وعليل..

ومفيش طبيب عارف علاجه

ولساني مربوط واخرس..

ومش قادر يقول أي حاجه

كأنه من سقعة الوحده..

عائش في كيس جوه تلاجه

لحد ما شفت عنيكي..

فلقيت فيها.. كل حاجه

(15)

يسلمي حبك .. اللي رد فيا الروح  
واللي بقا ملازمني مطرح ما بروح  
واللي نساني أيام البكا والنوح  
وخلاتي .. بأحلي كلام الحب أبوح

(16)

إن كان عشقك خطيئه  
وكان حبي ليكي هو ذنبي  
أنا هاتوب عن خطيئتي  
وأفضل أحبك بس بقلبي  
وأحلم بطيفك كل ليله

واخبي جوه ضلوعي حبي

وها أستغفر عن ذنوبي

واتمني يغفر هالي ربي

(17)

حطي أيدك علي قلبي

هتلاقيه بيردد اسمك

وكل دقه وشهقه فيه..

عليها بصمتك وختمك

وكل نقطة دم فيه

من نفس فصيلة دمك !!..



